

«Սալահէտտին Սէյրէթուլահը (Էօմէրին մզկիթը) կը տեսնէ հոն իրենց կրօնքին համեմատ յարգութիւն տալէն զկնի. երբ ժամանակ դուրս կ'ելնէ՝ կը տեսնէ որ նոյն իրենց տաճարին զիմացոքը երեւելի եկեղեցի մը կայ. — այս որո՞ւ է, կը հարցնէ Հայրապետին (Աբրահամ պատրիարքի). նա ալ կ'ըսէ թէ՝ — Մէրեւէմ Աննային ծնողացը տունն է և Յովակիմ—Աննա կը կոչուի: Կը դառնայ բարկութեամբ մը պատասխանել, թէ՝ — ես որուն անուամբը կառուցուած ըլլալը չեմ հարցնէր քեզի, այլ ո՞ր օգուտինն է այդ եկեղեցին՝ որ համարձակեր է մեր տաճարին (Հարէմի Շէրիֆին) դրան դէմ հոյակապ եկեղեցի կառուցանել:

Յայնժամ պատրիարքը ոտքը իննալով մը կ'ըսէ.

— Տէ՛ր, Ազգիս Հայոց ու քու նուաստ ծառայինդ է, և եթէ արժան դատես՝ ինձ պարգեւէ, ապա թէ ոչ կամք քո է՝ որպէս կամիս նոյնպէս արա. — իսկոյն կը հրամայէ Սալահէտտին՝ որ անի սօփտաներուն մէտրէսէ ըլլայ իր անուամբ. քանզի չէ արժան կ'ըսէ՝ մեր տաճարին դէմը եկեղեցի լինել և եթէ ես չառնում իմ յաջորդներս անշուշտ կ'առնուն. նա մանաւանդ Մար Եագուպը ձեզի բաշխեցի վասնորոյ անոր տեղ անպատճառ պիտի առնում աս, որ յազթութեանս նշան մը ըլլայ՝ ու ինձ համար աղօթեն յիշեալ սօփտաները: Կը սկսի սրբազան պատրիարքը դողալ ու սարսափիլ և շուարիլ (ինչպէս իր գրութենէն առնելով՝ երկու դար ու կէս յառաջ իր Ս. Երկրի Պատմութեան մէջ կը գրէ Տ. Յակոբ քահանայն Ամասիացի). «Մտածեցի թէ՛ եթէ հրաման բռնաւորին վերստին չկատարելու որ լինիմ, յայնժամ թէ Ս. Յակոբ ձեռագնուս պիտի երթայ, և թէ Յովակիմ—Աննան, ապա ուշի եկեալ մտածեցի թէ զինչ արարից. ուստի երկու չարեաց փոքրագոյնն է ընտրելի ասելով՝ երբ բռնաւորն թախանձեաց վերստին, իսկոյն առաջի նորա անկայ՝ և ասացի՝ կամք քոյին տէրութեանդ է. զայս ասելով յանձնեցի տունն Յովակիմ—Աննայի. և այս եղև Ուր. հոկտ. Ժ. թուականին»: Որ անկից, այսինքն 1187 թուականէն մինչև 1856 թուականին որ ըսել է՝ 669 տարի՝ Սալահուսսին մեհրեմեաի կամ Սալահիյե կը կոչուէր, նոյնիսկ Յովակիմ—Աննայի տունը:

Թէպէտ երբեմն Ռէ՛լ թուին, այսինքն՝ 1629 ամին, նոյն Յովակիմ—Աննայի եկեղեցւոյն հարաւային կողմը գտնուած մատուռը՝ ուր Սուրբ Կուսին Ծննդեան տեղն է. լատինք կարացին